

# Aishah Ghani tetap tanding

KUALA LUMPUR, Khamis — Datin Paduka Hajah Aishah Ghani tetap bertanding untuk mempertahankan jawatannya sebagai Ketua Pergerakan Wanita UMNO Malaysia, dalam perhimpunan agung pergerakan itu, 9 September depan.

Beliau mengesahkan keputusan mempertahankan jawatan itu ketika ditemui selepas merasmikan persidangan jabatan-jabatan di bawah kementeriannya, di sini hari ini.

Dengan itu, lenyaplah khabar-khabar angin yang mengatakan beliau akan menarik diri sekiranya dicalonkan semula.

Menteri Kebajikan Am itu memegang menjadi Ketua Pergerakan Wanita UMNO Malaysia sejak 10 tahun lalu, setelah mengalahkan Ketua Wanita ketika itu Tan Sri Hajah Fatimah Hashim.

Beliau terus memegang jawatan tersebut tanpa dicabar oleh tokoh-tokoh Wanita UMNO yang lain sehingga sekarang.

Selakat ini, belum ada pemimpin Wanita UMNO yang secara rasmi menyatakan keputusan mereka mencabar Ketua Wanita UMNO itu.

## Bersetuju

Ahli Majlis Tertinggi UMNO, Puan Marina Yusof ketika dihubungi hari ini berkata, beliau belum memutuskan sama ada bertanding atau tidak jawatan Ketua Wanita itu.

Katanya, keputusannya bertanding bergantung kepada keadaan.

"Masanya terlalu awal untuk saya buat keputusan mengenainya sekarang.

Naib-Ketua Wanita UMNO, Datin Paduka Rafidah Aziz dijangka tidak akan bertanding merebut jawatan itu.

Beliau pernah mengumumkan tidak lama dulu, keputusannya tidak akan menentang Datin Paduka Aishah, walaupun namanya dicalonkan untuk jawatan Ketua Wanita oleh

beberapa bahagian.

Bagaimanapun, Datin Paduka Rafidah bersetuju menerima pencalonan itu sekiranya terdapat kekosongan jawatan Ketua Wanita UMNO.

Dua lagi pemimpin Wanita UMNO yang disebut-sebut akan bertanding merebut jawatan tersebut selakat ini belum lagi membuat pengumuman rasmi mengenainya.

Mereka yang disebut-sebut itu ialah Datin Paduka Hajah Zaleha Ismail dan Puan Rahmah Othman.

Datin Paduka Zaleha ketika ditanya mengenai perkara itu baru-baru ini hanya berkata, "Tunggulah 9 September depan."

Bahan asal dari Arkib  
Negara Malaysia